

## **"Službene novine TK", broj: 03/02,05/04,11/04,05/06,13/09**

Na osnovu poglavlja IV, odjeljak B, člana 33. stav 1. tačke e) Ustava Tuzlanskog kantona, donosim

### **UKAZ**

#### **O PROGLAŠENJU ZAKONA O RADIO TELEVIZIJI TUZLANSKOG KANTONA**

Proglašava se Zakon o RTV Tuzlanskog kantona koji je donijela Skupština Tuzlanskog kantona na sjednici od 16. 4. 2002. godine.

Broj: 01-389/02  
Tuzla, 24. 4. 2002. godine

Predsjednik Tuzlanskog kantona, **Mr. Selim Bešliagić, v.r.**

## **ZAKON**

### **O RADIO-TELEVIZIJI TUZLANSKOG KANTONA I OSNOVNE ODREDBE**

#### **I OPĆI DIOI**

##### **Član 1.**

Radi obavljanja djelatnosti javnog informisanja u cilju ostvarivanja prava na informisanje i zadovoljavanje kulturnih, obrazovnih i drugih potreba naroda i građana u Tuzlanskom kantonu (u daljem tekstu: Kanton), Skupština Tuzlanskog kantona (u daljem tekstu: Skupština Kantona) osniva Javno preduzeće Radio-televizija Tuzlanskog kantona (u daljem tekstu: RTV TK).

RTV TK obavlja djelatnost od javnog društvenog interesa za Kanton i organizuje se kao društvo sa ograničenom odgovornošću.

##### **Član 2.**

RTV TK posluje pod firmom: Javno preduzeće Radio-televizija Tuzlanskog kantona, društvo sa ograničenom odgovornošću.

Skraćena firma Javnog preduzeća je: RTV TK d.o.o.

Sjedište RTV TK je u Tuzli

##### **Član 3.**

RTV TK odgovara za svoje obaveze cjelokupnom svojom imovinom.

##### **Član 4.**

Osnovna djelatnost RTV TK je djelatnost radija i televizije. Osnovna djelatnost se ispoljava naročito kroz:

- pripremanje, proizvodnju, reprodukovanje, difuziju i prijenos vlastitih radio i televizijskih programa namijenjenih javnosti u Kantonu, Federaciji Bosne i Hercegovine, Bosni i Hercegovini i svijetu;
- difuziju radio i televizijskih programa drugih radio i televizijskih stanica, te drugih proizvođača programa u zemlji i svijetu za javnost u Kantonu, Federaciji Bosne i Hercegovine i Bosni i Hercegovini;
- učešće u zajedničkim programima radio i televizijskih stanica u Kantonu, Federaciji Bosne i Hercegovine, Bosni i Hercegovini i svijetu;
- razmjenu radio i televizijskih programa sa drugim radiodifuznim organizacijama u Kantonu, Federaciji Bosne i Hercegovine, Bosni i Hercegovini i svijetu;
- održavanje i razvoj vlastite tehničke osnovne i prijenosne mreže za ostvarivanje programske djelatnosti;
- arhiviranje fonografskih i videografskih zapisa;
- ustupanje uz ugovorenu naknadu marketinškog prostora u okviru RTV programa, ili nakon završetka emitiranja programa za određeni dan;
- proizvodnju i prodaju audio i video zapisa;
- organizaciju, samostalno ili u saradnji sa drugim subjektima, različitih manifestacija u cilju proizvodnje programa.

Statutom RTV TK mogu se utvrditi i druge djelatnosti RTV TK (sporedna djelatnost) pod uslovom da nisu u suprotnosti sa osnovnom djelatnošću.

##### **Član 5.**

U okviru osnovne djelatnosti, RTV TK emituje programe na frekvencijama koje odobri nadležni organ za komunikacije.

## **"Službene novine TK", broj: 03/02,05/04,11/04,05/06,13/09**

### Član 6.

RTV TK pribavlja dozvolu za emitovanje programa od nadležnog organa za komunikacije, ako ispunjava opšte i posebne uslove koji vrijede za javne radio i TV stanice.

RTV TK je dužna pridržavati se kodeksa, pravila, naredbi, smjernica i međunarodnih standarda koji važe za javne radio i TV stanice.

### Član 7.

Skupština Kantona odlučuje o statusnim promjenama, promjeni djelatnosti i promjeni oblika, firmi i sjedištu RTV TK, raspodjeli godišnjeg profita i pokriću gubitaka, prestanku RTV TK, daje prethodnu saglasnost na odluku o načinu privatizacije RTV TK, odobrava trogodišnji plan poslovanja, odnosno odobrava revidirani plan poslovanja, te usvaja godišnji izvještaj o radu RTV TK

### Član 8.

RTV TK uređuje i proizvodi programe uz poštivanje umjetničkih i stvaralačkih sloboda i profesionalnih kriterija, u skladu sa zakonom i drugim propisima iz ove oblasti.

### Član 9.

RTV TK će svojim programima zadovoljavati interese javnosti, te voditi računa o odgovarajućoj zastupljenosti programa informativnog, kulturnog, obrazovnog, dokumentarnog, zabavnog, dječijeg, sportskog, filmskog i ostalih sadržaja.

U ostvarivanju programskih načela RTV TK će posebno:

- afirmisati, isticati i propagirati vrijednosti bosanskohercegovačkog društva,
- informisati javnost o političkim, privrednim, zdravstvenim, kulturnim, obrazovnim, naučnim, religijskim, ekološkim, sportskim i drugim događajima i pojavama u opštinama, Kantonu, zemlji i inostranstvu, te osigurati otvorenu i slobodnu raspravu o svim pitanjima od javnog interesa,
- njegovati, posticati i razvijati sve oblike stvaralaštva koji doprinose razvoju kulture i predstavljanju kulturnog identiteta bosanskoherce-govačkog naroda
- proizvoditi i/ili emitovati emisije namijenjene etničkim zajednicama, izbjeglicama, raseljenim licima, dječije programe, informativne programe, kontakt programe, te programe vezane za očuvanje kulturnog naslijeđa, zaštitu okoline, sportske programe i emisije zabavnog sadržaja.

### Član 10.

U ostvarivanju programa RTV TK je dužna:

- trajno, istinito, cjelovito, nepristrasno i pravovremeno informisati javnost o događajima i pojavama od javnog interesa u općinama, Kantonu, zemlji i inostranstvu;
- poštovati i podsticati pluralizam političkih, religijskih i drugih ideja, te omogućiti javnosti da bude upoznata sa tim idejama;
- politička, privredna, socijalna, zdravstvena, kulturna, obrazovna, naučna, ekološka i druga pitanja tretirati nepristrasno, omogućavajući ravnopravno sučeljavanje različitih stajališta.
- doprinostiti poštovanju osnovnih ljudskih prava i sloboda, demokratskih vrijednosti, te unapređenju javnog dijaloga;
- praćenje informativnog, kulturnog, obrazovnog i zabavnog programa prilagoditi potrebama lica oštećenog sluha i drugih lica sa posebnim potrebama;
- poštovati privatnost, dostojanstvo, ugled i čast građana, a posebno djece i omladine;
- njegovati opšteprihvaćena društvena mjerila;

### Član 11.

U programima RTV TK zabranjeno je:

- podsticati i širiti nacionalnu, rasnu ili vjersku mržnju, kao i podsticati na diskriminaciju ili neprijateljstvo prema pojedincima ili grupama zbog njihovog porijekla, boje kože, političkog uvjerenja, vjerskog opredjeljenja, zdravstvenog stanja, spola ili drugih osobina;
- objavljivati priloge nemoralnog, a posebno pornografskog sadržaja;
- na bilo koji način podsticati nasilje i kriminal;
- podsticati građane, a posebno djecu i omladinu, na upotrebu duhanskih prerađevina, alkohola ili droga.

### Član 12.

Program RTV TK priprema se i emituje na jezicima i pismima koji su u službenoj upotrebi u Kantonu.

Upotreba jezika i pisma iz prethodnog stava nije obavezna:

- ako se emituju filmovi i/ili druga audio i audiovizuelna djela u izvornom obliku;
- ako se emituju muzička djela sa tekstom, koji je dijelom ili u cjelosti, pisan na stranome jeziku;
- ako su emisije, dijelom ili u cjelosti, namijenjene učenju stranih jezika;
- ako su emisije namijenjene pripadnicima etničkih zajednica.

## **"Službene novine TK", broj: 03/02,05/04,11/04,05/06,13/09**

### Član 13.

Komercijalne aktivnosti RTV TK (saopštenja od komercijalnog interesa, objavljivanje reklama, sponzorisanje, emitovanje za treća lica) se mogu obavljati na način i prema postupku utvrđenom zakonom i drugim propisom iz ove oblasti.

## **II FINANSIRANJE DJELATNOSTI**

### Član 14.

Sredstva za osnivanje i rad RTV TK čini cjelokupna imovina RTV TK iskazana u bilansu stanja po godišnjem obračunu za 2005. godinu.

### Član 15.

RTV TK preuzima prava i obaveze JP RTV TPK, u skladu sa Zakonom.

### Član 16.

Imovinu RTV TK čine sredstva pribavljena od osnivača, sredstva stečena radom zaposlenih kroz pružanje usluga i prodajom proizvoda i usluga ili pribavljena iz drugih izvora u skladu sa važećim propisima.

Sredstva za rad RTV TK osiguravaju se iz sljedećih izvora:

- budžeta Kantona,
- prodajom vlastitih proizvoda i vršenjem i prodajom usluga u okviru osnovne i sporedne djelatnosti,
- drugih izvora prihoda, u skladu sa važećim propisima.

### Član 16a.

Profit RTV TK formira se u skladu sa zakonom i drugim propisima.

### Član 17.

Skupština Kantona, na osnovu srednjoročnih i godišnjih programa razvoja RTV TK, osigurava iz sredstava Budžeta Kantona dio sredstava za:

- izgradnju ključnih infrastrukturnih objekata značajnih za tehničko-tehnološki razvoj RTV TK;
- razvoj prijenosne i emisione mreže za emitovanje programa od interesa za Kanton;
- programske projekte od šireg društvenog i kulturnog značaja.

### Član 17a.

Osnivač odgovara za obaveze RTV TK do visine osni-vačkog udjela.

## **III OSTVARIVANJE POSEBNOG DRUŠTVENOG INTERESA**

### **BIRAN 05/06 Član 18.**

**Poseban društveni interes Skupština Kantona ostvaruje:**

- davanjem prethodne saglasnosti na statusne promjene, promjenu djelatnosti, naziva firme i sjedišta RTV TK;
- davanjem saglasnosti na planove razvoja RTV TK i na izvještaje o izvršenju planova razvoja i poslovanja;
- BRISANA 05/04** imenovanjem članova Upravnog i Nadzornog odbora RTV TK.

### Član 19.

Radi ostvarivanja uticaja javnosti na utvrđivanje programsko-uređivačke politike, obrazuje se Uredničko vijeće RTV TK (u daljem tekstu: Vijeće RTV TK).

Vijeće RTV TK ima pet članova.

Članove Vijeća RTV TK imenuje i razrješava Nadzorni odbor RTV TK, uz prethodno pribavljeno mišljenje nadležnog organa za komunikacije.

Članovi Vijeća RTV TK imenuju se na način da se osigura kvalitetno predstavljanje zajednice kojoj se služi.

Članovi Vijeća RTV TK imenuju se iz reda istaknutih predstavnika obrazovnih, naučnih, kulturnih, sportskih institucija i vjerskih organizacija.

U sastavu Vijeća RTV TK mora biti najmanje jedan prosvjetni radnik.

Član Vijeća RTV TK ne može biti iz reda izabranih nosilaca javnih funkcija, lice koje obavlja neku dužnost u tijelima političke stranke, kao i lice iz reda zaposlenika RTV TK.

Članovi Vijeća RTV TK se imenuju na period od dvije godine i po isteku mandata mogu biti ponovo imenovani.

Isto lice ne može biti imenovano za člana Vijeća RTV TK više od dva puta uzastopno.

### Član 20.

Članu Vijeća RTV TK može prestati mandat prije isteka vremena na koje je imenovan:

- na vlastiti zahtjev,

## **"Službene novine TK", broj: 03/02,05/04,11/04,05/06,13/09**

- podnošenjem ostavke,
- ako svojim radom povrijedi zakon i druge propise koji se odnose na rad i obavljanje djelatnosti RTVTK i
- u drugim slučajevima utvrđenim Zakonom i Statutom RTV TK.

### Član 21.

Vijeće RTV TK:

- savjetuje glavnog i odgovornog urednika o načinima poboljšanja programske ponude kako bi bili zadovoljeni interesi i potrebe zajednice, vodeći računa o ukupnim programskim obavezama, te mogućnostima RTV TK;
- predlaže, prati i ocjenjuje ukupnu programsku ponudu RTV TK, te ukazuje na uočene probleme i daje savjete o načinima njihovog rješavanja;
- prati primjenu programskog, jezičkog i ekonomsko--propagandnog kodeksa i o uočenim propustima obavještava glavnog i odgovornog urednika RTV TK;
- bira predsjedavajućeg Vijeća na mandatni period od godinu dana;
- obavlja i druge poslove u skladu sa zakonom i drugim važećim propisom.

### Član 22.

Rad Vijeća RTV TK je javan.

Rad Vijeća RTV TK uređuje se Poslovníkom o radu Vijeća.

## **IV ORGANI RTV TK**

### Član 23.

Organi RTV TK su:

1. Skupština
2. Nadzorni odbor
3. Uprava kao organi upravljanja, i
4. Odbor za reviziju .

### Član 23a.

Ovlaštenja Skupštine RTV TK, u ime osnivača, vrše predstavnici osnivača (u daljem tekstu: Skupština RTV TK), koje u ime osnivača imenuje Vlada Kantona u skladu sa odredbama Zakona o ministarskim, vladinim i drugim imenovanjima i Zakona o sukobu interesa u organima vlasti u Federaciji Bosne i Hercegovine.

Skupština RTV TK ima predsjednika i osam članova (u daljem tekstu: član).

Mandat članova Skupštine RTV TK traje četiri godine.

### Član 23b.

Član uprave, predsjednik i član Nadzornog odbora RTV TK ne mogu biti članovi Skupštine RTV TK.

Za člana Skupštine RTV TK ne može biti imenovano lice koje ima direktan ili indirektan finansijski i drugi privatni interes u RTV TK.

### Član 23c.

Vlada Kantona može razriješiti člana Skupštine RTV TK i prije vremena na koje je imenovan u slučaju da član sam zatraži razrješenje, tri puta neopravdano izostane sa sjednice ili u periodu od tri mjeseca ne učestvuje u radu Skupštine RTV TK, ako se utvrdi da je odgovoran za nezakonit rad ili svojim radom prouzrokuje veću štetu RTV TK i u drugim slučajevima utvrđenim zakonom i statutom.

### Član 23d.

Skupština RTV TK usvaja statut RTV TK, imenuje članove Nadzornog odbora RTV TK uz prethodnu saglasnost Vlade Kantona, te vrši i druge nadležnosti utvrđene Zakonom o privrednim društvima i Zakonom o javnim preduzećima, ako ovim zakonom nije drugačije određeno.

### Član 24.

Organ upravljanja u RTV TK je Nadzorni odbor, koji broji pet članova.

Predsjednika i članove Nadzornog odbora imenuje i razrješava Skupština RTV TK, u skladu sa Zakonom o ministarskim, vladinim i drugim imenovanjima Federacije Bosne i Hercegovine i Zakonom o sukobu interesa u organima vlasti u Federaciji Bosne i Hercegovine.

Mandat članova Nadzornog odbora traje četiri godine.

Za predsjednika ili člana Nadzornog odbora RTV TK ne može biti imenovano lice koje ima direktan ili indirektan finansijski i drugi privatni interes u RTV TK

## **"Službene novine TK", broj: 03/02,05/04,11/04,05/06,13/09**

### Član 25.

Pored nadležnosti utvrđenih u Zakonu o privrednim društvima, Nadzorni odbor ima i sljedeće nadležnosti:

- nadzire rad Uprave i poslovanja RTV TK,
  - priprema i predlaže Etički kodeks, poslovničke i druge akte,
  - imenuje i razrješava članove Uprave,
  - vrši izbor kandidata Odbora za reviziju i podnosi prijedlog za imenovanje Skupštini RTV TK,
  - donosi Odluku o načinu privatizacije uz prethodnu saglasnost Skupštine Kantona,
  - razmatra i nadzire postupak javnih nabavki,
  - daje mišljenje Skupštini Kantona o prijedlogu Uprave za raspodjelu profita,
  - daje upute Upravi za provođenje mjera i aktivnosti prilikom uočenih nepravilnosti,
  - nadzire Upravu u primjeni preporuka Odbora za reviziju i vanjskog revizora,
  - daje ovlaštenja za aktivnosti koje su ograničene na osnovu Zakona o javnim preduzećima u Federaciji Bosne i Hercegovine,
- odlučuje o ostalim pitanjima u skladu sa zakonom i Statutom RTV TK.

### Član 25a.

Član Nadzornog odbora RTV TK može biti razriješen i prije vremena na koje je imenovan u slučaju da sam zatraži razrješenje, tri puta neopravdano izostane sa sjednice ili u periodu od tri mjeseca ne učestvuje u radu Nadzornog odbora RTV TK, ako se utvrdi da je odgovoran za nezakonit rad ili svojim radom prouzrokuje veću štetu RTV TK i u drugim slučajevima utvrđenim zakonom i statutom

### Član 26.

Uprava je organ upravljanja u RTV TK, koji vodi poslovanje i zastupa RTV TK, i odgovara za zakonitost poslovanja.

Upravu čine direktor i izvršni direktor, čiji se broj, nadležnosti, ovlaštenja i odgovornost utvrđuju statutom RTV TK.

Upravu bira i razrješava Nadzorni odbor većinom glasova.

- Uprava se bira na osnovu javnog konkursa, u skladu sa zakonom i statutom RTV TK.

### Član 27.

Pored nadležnosti utvrđenih u Zakonu o privrednim društvima, Uprava je nadležna za:

- izvještavanje Nadzornog odbora RTV TK, na njegov zahtjev,
- provođenje Statuta, Etičkog kodeksa i drugih akata RTV TK,
- osiguranje provođenja propisa za postupak javnih nabavki,
- priprema prijedlog o raspodjeli profita ili pokriću gubitka,
- izradu i nadgledanje realizacije planova poslovanja,
- zapošljavanje i otpuštanje zaposlenika prema Pravilniku o radu i važećim propisima,
- druge aktivnosti neophodne za nesmetano poslovanje RTV TK u skladu sa zakonom i Statutom RTV TK.

### **BRISAN 05/06 Član 28.**

**Nadzorni odbor vrši kontrolu nad poslovanjem RTV TK, pregleda izvještaje o poslovanju, godišnji obračun, prijedlog za raspodjelu dobiti, te urednost i zakonitost vođenja poslovnih knjiga.**

**O rezultatima kontrole, Nadzorni odbor obavještava Skupštinu Kantona, Vlada Kantona i Upravni odbor RTV TK jednom godišnje, a po potrebi i češće.**

### Član 29.

Direktor predsjedava Upravom, rukovodi poslovanjem, zastupa i predstavlja RTV TK i odgovara za zakonitost poslovanja.

Mandat direktora je četiri godine.

Položaj, ovlaštenja, odgovornosti i prava direktora uređuju se ugovorom između Nadzornog odbora i direktora.

Izvršni direktor organizuje rad, zastupa i predstavlja RTV TK i odgovara za zakonitost poslovanja, u obimu utvrđenom pismenim aktom direktora.

Mandat izvršnog direktora traje četiri godine.

### Član 30.

U RTV TK se imenuje Odbor za reviziju, na način i po postupku utvrđenom Zakonom o javnim preduzećima u Federaciji Bosne i Hercegovine i Zakonom o mini-starskim, vladinim i drugim imenovanjima Federacije Bosne i Hercegovine.

Nadležnosti Odbora za reviziju utvrđene su Zakonom o javnim preduzećima u Federaciji Bosne i Hercegovine.

**Član 31.**

RTV TK ima glavnog i odgovornog urednika, u skladu sa Zakonom i drugim važećim propisima.

Za glavnog i odgovornog urednika RTV TK može biti imenovano lice koje ima visoku stručnu spremu, pet godina radnog iskustva u novinarskoj struci i koje se ističe organizacionim sposobnostima.

Glavnog i odgovornog urednika radija i televizije RTV TK imenuje i razrješava Upravni odbor, na osnovu javnog konkursa.

Glavni i odgovorni urednik RTV TK imenuje se na period od 4 godine i po isteku mandata može biti ponovo imenovan

Statutom RTV TK bliže se uređuju prava, obaveze i odgovornosti glavnog i odgovornog urednika u skladu sa zakonom i drugim važećim propisom.

**Član 32.**

Izabrani vršilac javne dužnosti, ili lice koje je član organa političke partije ili organizacije koja je povezana sa političkom partijom ne može biti imenovano na mjesto direktora, odnosno glavnog i odgovornog urednika u RTV TK.

**V POSEBNE ODREDBE**

**Član 33.**

Statut RTV TK donosi Upravni odbor uz saglasnost Vlade Kantona.

Statutom RTV TK utvrđuje se: naziv, sjedište i osnivač RTV TK; obaveze RTV TK prema osnivaču; djelatnost - način i uslovi obavljanja djelatnosti; organizacija RTV TK; statusne promjene; odnos prema korisnicima usluga; uređivačko vijeće; imenovanje, nadležnosti, prava, obaveze i odgovornosti organa upravljanja, nadzora i rukovođenja u RTV TK, opća akta koja se donose u RTV TK i način njihovog donošenja, te druga pitanja utvrđena zakonom.

**Član 34.**

Međusobna prava i obaveze između RTV TK i državnih, entitetskih i općinskih radio-televizijskih preduzeća u oblasti održavanja prijenosnog i emisionog sistema regulišu se posebnim ugovorima.

**VI PRIJELAZNE I ZAVRŠNE ODREDBE**

**Član 35.**

Ovaj Zakon služi kao osnivački akt na osnovu kojeg će se izvršiti upis RTV TK u sudski registar.

Upisom RTV TK u sudski registar prestaje sa radom JP RTV TPK, a nastavlja sa radom kao RTV TK.

RTV TK preuzima imovinu, prava, poslovni prostor, sredstva za rad, opremu i inventar, te arhivu, akte, predmete i drugu dokumentaciju na dan stupanja na snagu ovog Zakona od JP RTV TPK.

RTV TK preuzima zaposlenike, koji su bili u radnom odnosu na dan stupanja na snagu ovog Zakona u JP RTV TPK.

Raspoređivanje zaposlenika iz stava 4. ovog člana na odgovarajuća radna mjesta izvršit će se u skladu sa općim aktima RTV TK.

**Član 36.**

RTV TK organizovaće se i početi sa radom danom upisa u sudski registar, a najkasnije u roku od 60 dana od dana stupanja na snagu ovog Zakona.

**Član 37.**

Stupanjem na snagu ovog Zakona, u roku od 30 dana Skupština Kantona će imenovati Upravni odbor RTV TK u skladu sa članom 24. ovog Zakona.

Na sva pitanja koja nisu regulisana ovim Zakonom, primjenjuju se odredbe Zakona o javnim preduzećima i važeći propisi iz oblasti informisanja.

**Član 38.**

RTV TK dužna je uskladiti svoja akta sa odredbama ovog Zakona u roku od 30 dana od dana upisa u sudski registar.

**Član 39.**

Stupanjem na snagu ovog Zakona prestaje da važi Zakon o radio-televiziji Tuzlansko-podrinjskog kantona ("Službene novine TPK", br. 1/95).

**Član 40.**

Ovaj Zakon stupa na snagu osmog dana od dana objavljivanja u "Službenim novinama Tuzlanskog kantona".

Bosna i Hercegovina      Predsjednik Skupštine Tuzlanskog kantona **Dr. Izet Žigić, v.r.**  
Federacija Bosne i Hercegovine TUZLANSKI KANTON Skupština  
Broj: 01-02-594-24/01 Tuzla, 16. 4. 2002. godine